

Berita Minggu, Ahad, 30 Ogos, 1981

Disiplin, harmoni jadikan panduan

Oleh ZAINUDDIN AYIP

KUALA LUMPUR, Sabtu — Perdana Menteri, Datuk Seri Dr. Mahathir Mohamad menegaskan, tema Hari Kebangsaan tahun ini — Berdisiplin Berharmoni — harus dijadikan panduan dalam usaha membangunkan negara, meningkatkan kemakmuran dan kesejahteraan rakyat.

Menurut beliau, keharmonian tidak mungkin dicapai jika sikap dan pandangan hidup rakyat berbilang kaum di negara ini tidak mengikut rangka disiplin yang ditetapkan.

"Rangka disiplin itu ialah tata hidup berbaik-baik, saling hormat menghormati dan mengamalkan prinsip-prinsip Rukun Negara," kata Perdana Menteri lagi.

Dalam kata-kata aluannya di Buku Cenderamata Aturcara Perayaan Hari Kebangsaan yang diedarkan kepada akhbar-akhbar, hari ini, Datuk Seri Dr. Mahathir menjelaskan, "man-

ifestasi hidup berdisiplin adalah kerukunan dan keharmonian sebagai landasan ke arah kemakmuran dan kesejahteraan.

Kehidupan dan hubungan harmoni antara kaum adalah asas kukuh ke arah perpaduan sejati, khususnya di negara berbilang kaum seperti Malaysia," tambahnya.

Hari Kebangsaan, Isnin ini turut dirayakan di peringkat negeri dan daerah. Acara-acara yang disusun adalah disesuaikan dengan tema tahun ini — Berdisiplin Berharmoni.

Di peringkat kebangsaan, Seri Paduka Baginda Yang di-Pertuan Agong, Raja Per-

maisuri Agong, Perdana Menteri, Datuk Seri Dr. Mahathir, Mohamad dan Menteri-menteri kabinet lain turut sama menyaksikan acara-acara telah disusun.

Selaku Perdana Menteri, Datuk Seri Dr. Mahathir akan menyampaikan amanat penting sempena Hari Kebangsaan menerusi RTM jam 8.45 malam esok.

Acara kemuncak perayaan peringkat kebangsaan diadakan di Padang Kelab Selangor, hadapan Bangunan Sultan Abdul Samad mulai jam 8.00 pagi Isnin ini.

Acara-acara menarik seperti perhimpunan rakaakas, persembahan pancaragam murid-murid sekolah, akan disiarkan

secara langsung oleh RTM.

Raptial penuh per-tunjukan itu diadakan pagi ini. Lebih 20,000 orang dari setiap lapisan masyarakat berbilang kaum turut sama menyertai perhimpunan itu.

Di samping itu, 2,115 murid dari 40 sekolah akan mendendangkan lagu patriotik yang bertemakan 'Berdisiplin Berharmoni'.

Lapan ratus pandu pateri juga akan mempersembahkan lapan tarian melambangkan kedaulatan Raja dan Negara, suasana aman dan harmoni dan sejarah kedatangan orang-orang Islam ke negara ini.

Mereka juga akan mempersembahkan tarian 'Anak Ayam Turun Sepuluh', 'Timang Burung', 'Beban Asmara' dan 'Jingklng Nona'.

Di sebelah malamnya pula, ibu negara akan bermandikan cahaya dan dihiasi indah dengan kelipan neon dan lampu berwarna warni di pintu-pintu gerbang.

Di tempat yang sama, pertunjukan kebudayaan dan kereta berhias akan diadakan.

Di Pangung Anniversari pula, pertunjukan Pentarama oleh artis Jabatan Penerangan akan menghiburkan orang ramai dengan nyanyian, tarian dan lawak jenaka.